



HISPANIA

HISPANIA VNDIQUE ALLVITVR MARI, excepto eo latere quo Galliam cōtingit, ibi enim altissimis Pyreneis montibus secernitur ab ea. Hæc olim in tres fuit distincta partes, Baticam scilicet, Lusitaniam & Tarraconensem. Et secundum Berosum primus rex eius fuit Tubal, No- hæ nepos : qui uidens terram aptam pro pecoribus nutriendis, studuit in ea propagare rem pecuariā, unde & terrā hinc uocatam putant Tarraconam, quasi תרין קרנא id est, bonum possessio. Huic successit Iberus, à quo fluuius Iberus denominatus est, & regio quam perlabitur Celtiberia. Sextum regem asserunt fuisse Batū, à quo Batica regio nomen accepit. Decimus rex fuit Hispanus, aut secundū alios Hispalus, qui toti regioni Hispaniæ nomen reliquit. Duodecimus fuit Hesperus, à quo etiam Hispania Hesperia appellata est. Decimus septimus fuit Lusus, à quo Lusitania, quæ hodie est Portugallia, denominata est. Quando uero Romani imperare cœperunt in Hispania, diuisa fuit in duas prouincias, Baticā scilicet & Tarraconensem, durauitq; illa diuisio usq; ad Attilam, qui rursus aliam in ea fecit distinctionem. Posteris uero temporibus diuisa fuit in quinque regna, Galliciam, Nauarram, Castiliam seu Legionum regnum, Cataloniam, quæ & Arragonia est, Portugalliam & Granatam. Gallicia nō diu proprium habuit regem, ideo in numerum non uenit.